

ԱՆԱՀԻՏ ՄԿՐՏՈՒՄՅԱՆ

Կյանքի 69-րդ տարում կյանքից հեռացավ ՀՀ ԳԱԱ Հ. Աճառյանի անվան լեզվի ինստիտուտի բարբառագիտության բաժնի աշխատակից Անահիտ Մամիկոնի Մկրտումյանը:

Ա. Մկրտումյանը ծնվել է 1955 թվականի հուլիսի 21-ին, Լոռու Շամլուղ ավանում: 1972 թվականին ավարտել է Երևանի Ստ. Զորյանի անվան միջնակարգ դպրոցը և ընդունվել Երևանի պետական համալսարանի բանասիրական ֆակուլտետը, որն ավարտել է 1978 թվականին: 1979 թ. աշխատանքի է ընդունվել ՀՀ ԳԱԱ Հ. Աճառյանի անվան լեզվի ինստիտուտի բարբառագիտության բաժնում, նախ՝ որպես լաբորանտ, ավագ լաբորանտ, այնուհետև գիտաշխատող:

Ա. Մկրտումյանը տարիների ընթացքում մեծածավալ աշխատանք է կատարել ըստ «Հայերենի բարբառագիտական ատլասի նյութերի հավաքման ծրագրի», գրանցել վերացման վտանգի տակ գտնվող բազմաթիվ բնակավայրերի խոսվածքներ, որոնք առանձին տետրերով պահվում են ինստիտուտի գրադարանում: Նա հեղինակ էր նաև գիտական հոդվածների: Նա թեկնածուական ատենախոսության թեմա էր ընտրել Փերիայի բարբառի ուսումնասիրությունը, որի շուրջ լույս է ընծայել առանձին հոդվածներ, կարդացել գիտական զեկուցումներ՝ տարբեր գիտաժողովներում, բայց այնպես էլ հրապարակային պաշտպանության չներկայարեց այդ կարևոր բարբառի ամբողջական ուսումնասիրությունը:

Աշխատանքի վերջին շրջանում զբաղվում էր գրանցված խոսվածքների հատկանիշների աղյուսակների կազմմամբ՝ ըստ Գ. Ջահուկյանի մշակած բազմահատկանիշ դասակարգման սկզբունքի:

Ա. Մկրտումյանը շիտակ, ազնիվ և աշխատասեր գործընկեր էր: Նրա հիշատակը միշտ կմնա գործընկերների և նրան ճանաչողների սրտերում: